

欽定古今圖書集成/博物彙編/藝術典/第 485卷



以2024年12月26日从维基文库导出



欽定古今圖書集成博物彙編藝術典

第四百八十五卷目錄

醫部彙考四百六十五

痘疹門七

萬氏家傳痘疹心法

[治痘凡例](#) [藥性主治及修製法](#) [氣類](#)

[血類](#)

[解毒類](#)

藝術典第四百八十五卷

醫部彙考四百六十五醫部彙 考四百六十五

痘疹門七痘疹門七

《明萬氏家傳痘疹心法》

《明萬氏家傳痘疹心法》

治痘凡例治痘凡例

凡發熱疑似之間，宜用人參敗毒散一劑以發之。是與不是，一發便明。大抵瘡疹，只要發盡，不使留伏於中也。

凡初發表要看天時，如天時大寒，則腠理閉密，氣血凝澀，防其發泄得遲，有毒氣壅遏之變，以辛熱之藥發之，宜桂枝葛根湯、五積散去乾薑主之。如天時大熱，則腠理開張，氣血淖澤，防其發泄太急，有潰爛之變，以辛涼之藥解之，宜升麻葛根湯、雙解散主之。如不寒不熱，天氣溫和，只人參敗毒散甚佳。

凡初發熱二三日，間有驚搐者，以導赤散、羌活湯、辰砂散主之。大便祕者，三黃丸微利之。小便澀少者，導赤散。渴甚者，葛根解毒湯。腹中痛者，桂枝大黃湯。腰痛者，人參敗毒散。自利者，黃芩湯。吐利者，黃芩加半夏湯。如脾胃素弱，自利清白者，理中湯、丸，或四君子湯、肉荳蔻丸，合而服之。

凡痘子出現，疏則毒輕，不可妄治，密則毒甚，卻要磊落，大小分明，不相黏連，略與托裡解毒之劑，快斑湯、消毒飲主之，使之易發易靨。如出太密，黏連模糊，其毒尤甚，托裡解毒之劑宜多飲之，以防癢塌黑陷之變。更察外證，可治則治，不可治則勿治。

凡痘子出形，皮肉如常，根苗明潤，此毒輕也，不可妄治。如皮肉昏黑或赤腫，根苗乾枯，青紫或灰白者，此毒甚也，以消毒飲、奪命丹合服。

凡痘子已出，自發標之日算起，如當起發，不應有漿，先有戴漿者；如當作漿，不應收靨，便有乾收者。此皆惡候，治之無功。

凡痘子之出，最要脣潤舌潤，紅鮮如常，其毒則輕。如脣焦破裂，舌燥有芒，為毒火太甚，表裡鬱遏，急宜解之，黃連解毒湯加大力子、東垣涼膈散更妙。

凡痘子已出，頭面要稀疏磊落，頸項上宜少不宜多，胸前要少而疎，如此者其毒則輕。如面上模糊一片，未發先腫，纏項稠密，胸前亦密，此毒甚也，慎勿治之。凡痘子初出，磊磊落落，似稀疏之狀，其後旋加，日多一日，此毒伏於裡，裡氣虛弱，不能使之即出，要大補兼解毒，或十可救其二三也。十宣散加無價散主之。凡痘子初出，便自手足先出者，他處未起而手足先起，他處未收而手足先收者，此陽火太旺，宜用解毒抑陽扶陰之劑，四物湯合黃連解毒湯主之。如他處俱起而手足起遲，他處俱收而手足不收者，此脾胃虛弱，不能行其氣血，達於手足。宜補脾胃，「十全大補湯、桂枝芍藥湯主之。」

凡痘子出盡，正將起發，其中有發血泡者，此毒伏於心即死。有發水泡者，此毒伏於肝，旋見癢塌而死。凡痘子始出，須問其咽喉痛與不痛，但有微痛，急與解之，令得疏通，甘桔湯加牛蒡子主之。大抵痘家要以解咽喉

為急務，不知此義，以致失聲乾噦，水穀不入，嘔吐而出，悔無及矣。

凡痘子不渴者，裡無熱也，不須妄治。渴者有熱，此亦常候，切不可與冷水、瓜、梨、柑、柿、糖、蜜之屬，恐損脾胃，致生他變。小渴者，以炒米湯與之。大渴者，人參麥冬散主之。痘子稠密，津液少者，補中用十全大補湯，解毒用葛根解毒湯，相間服之。自利而渴，輕則白朮散，甚則陳氏木香散主之。

「凡痘子要大小便自調，則裡氣和，無留邪也，故小便宜長而清。如小便赤澀，導赤散；小便短少，八正散。瘡出太密，小便不通者，連翹湯。」蓋瘡子發熱，不可驟去，惟利小便以折其鬱。如痘稠密，小便少者，此氣血衰少，津液虛耗，非熱也，不可利之，反損真陽之氣，十全大補湯主之。能食者，大便宜潤，有入必有出也。不能食者，大便宜實，存舊穀氣，以養氣血也。如四五日不行，大便結燥者，用膽導法導之。不通，以三黃丸微利之。如大結腹脹者，以三乙承氣湯下之。如大便泄瀉，即止之。蓋痘瘡要裡氣實，恐瀉得脾胃虛也。輕則理中湯丸、益黃散、荳蔻丸，甚則陳氏木香散、異功散主之。

凡痘子大便出血者，看其血來何如，又看是何時。如瘡子正壯，大便數日未行，血從糞出者，此肛門傷血出也。如瘡已收，大便膿血者，此倒靨之血也。非此二類，但溺血便血者，乃臟腑敗壞，陰血妄行，必死之候。凡痘子腹中常宜寬舒，為裡無邪。若腹脹滿，須審其傷食否，及大小便何如。如曾傷食，微滿不痛者，木

香大安丸。脹滿腹痛甚者，丁香脾積丸。小便不通者，百祥丸。大便不通者，宣風散主之。此上諸證，皆實脹者也，故宜利之。若自利腹脹，乃虛脹也，陳氏丁香散主之。

凡痘子手足常宜和暖，頭宜涼，故頭熱手足冷者不治。如因泄瀉手足冷者，此脾胃虛弱也，陳氏木香散、異功散聖藥也。如大熱渴，大便祕，煩躁手足冷者，此陽極似陰也，三乙承氣湯主之。凡手足冷者，惡候也。手足諸陽之本，陽脫故冷也。

凡痘家能食者，不問祕稠皆吉，不能食者，痘雖疎亦難發難靨，瘡密者危。蓋人絕水穀則死，表裡皆病則困也。有欲食而不能食者，必喉舌有痘作痛，艱於吞嚼也。宜以爛粥米飲頻頻與之，以助脾胃之氣。更以甘桔湯加牛蒡子，以解咽喉，利胸膈也。

凡痘瘡飲食之間，毋令太饑，毋令太飽，毋太寒，毋太熱，以損脾胃，但與糜粥、爛飯、淡薄滋味以養之。切忌肥甘、煎炒、五辛，一切動風動火之物。

凡痘子出得稀疎者，自然易發易靨，不可妄治。若瘡稠密，常患其發不能透，宜細觀之。但紅活不甚長大者，氣不足也，用四君子湯合勻氣散加燒人糞治之。如掀腫色帶紅紫者，血熱也，用四物湯合消毒散加燒人糞治之。如不潤澤而乾者，此血弱也，用活血散加消毒飲與之。如不起發，不紅活，平塌灰白者，此氣血俱弱也，用十全大補湯加燒人糞、牛蒡子與之。如有青乾者，內服快斑湯加燒人糞，合奪命丹與之，外用四聖散合胭脂塗法，或用水楊湯浴法，務求光壯紅活而

後已。如中間有成水泡者，防其癢塌，宜先補脾胃，疏風瀉火，使肌肉實不作癢可也，十全大補湯加防風、大力子主之。

凡痘子貴在調養，如天大寒，蓋覆常宜溫暖，勿使受寒，恐毒氣為寒所阻而不得出也。如天大熱，不可蓋覆，卻宜清涼，勿使客熱與毒相併，致增煩躁，使瘡潰爛也。如時有迅雷烈風暴雨之變，宜謹帷帳，添蓋覆，多燒辟穢香，以避一時不正之氣。勿掃房室，勿動溝渠，勿啟溷廁，恐穢臭觸瘡而增癢痛也。勿燒諸香，恐「其動火也。門戶常須關閉，服事之人選其謹厚潔淨者，無狐臭者，使之看守保護，內者勿出，外者勿入，恐有不潔，觸犯其瘡也。」瘡家所忌，男女房事，及屍氣最毒，其他則婦人月事，酒氣，五辛之氣，遠行染帶之氣，皆宜避之。如夜房室中有虛嚮，此不祥之兆也。其病者，臥處常要無風，又要通明，切忌幽暗。夜靜不斷燈火，不離親人看守，恐要飲食一時得具。或有癢塌，與之撫摩，恐他人未必盡心也。

凡痘子膿成漿熟，或癢悞犯破者，恐復灌爛，不能成痂。若膿漿未成之時，犯破半箇，必然癢塌而死。凡痘子勢重者，以脈候之，脈洪實者吉，浮數虛小者凶。故云：「脈淨身涼者生，脈躁身熱者死。」《又》云：「陽病得陰脈者死。」

凡痘子癢癢者，須於形色上詳審。如瘡一向起發紅活，光壯肥滿，忽然癢癢者，此穢氣所觸也，宜內服十全大補湯，外用茵陳熏法。其破者，以白龍散傅之。如瘡本乾枯，又添癢癢者，火甚也。如瘡原帶水，皮肉嫩薄又

癢者，此濕熱也，擺頭搖項，手足動作昏悶者，死證也。

凡痘子已熟，忽作癢癢抓破者，此脾胃虛弱，不能榮養肌肉也，內服四君子湯加黃芪、官桂，外以敗草散主之。如因自利脾胃虛致癢塌者，陳氏木香散、異功散主之。

凡痘子出盛咳嗽者，此肺中有火，或咽喉有瘡作癢也，只用甘桔湯加牛蒡子多服良。如唾涎帶血，此咽中瘡，或齒縫中出也，不須妄治。

凡痘子黑陷，古方用穿山甲者，取其穿腸透膜而善走也。用人牙者，取牙齒乃骨之餘，腎主骨，可以入腎也。此二物者，但借為鄉道引解毒之劑以施治則可，若單用之，何濟於事哉。有用燒人糞者，蓋糞大解疫毒，痘乃時疫所發，故宜用之。若加入發表和中解毒湯內尤良。

凡痘子已出之後，最怕泄瀉，恐脾胃虛，裡氣弱，不能助瘡成就，反致倒陷，以理中湯、肉荳蔻丸合而治之。如泄久不止，瘡癢塌，手足冷，寒顫咬牙者，陳氏木香散、異功散主之。

凡痘子寒顫咬牙，手足冷者，惡候也。急用陳氏之法救之。瘡壞者勿治。

凡病痘者，瘡本稠密，轉動之間，身體振搖者，此一身被瘡所困，不能支持轉動艱難之故，斷不可便作寒顫，妄投熱藥也。有只咬牙者，此心肝二經火旺也。蓋肝虛

咬牙，心熱者亦咬牙，勿便作不治論。凡痘子已熟，不肯結痂潰爛者，其人必不能食，或曾吐瀉，脾胃虛弱也，內服十全大補湯，外用敗草散主之。如大便不通。此內熱也。用膽導法。以去其結糞。外以天水散。蜜水調刷。以解肌表之熱。

凡痘子收後，目癢澀羞明，或泪出者，此肝火虛旺也，瀉肝明目散主之。如中醫膜遮睛者，蟬蛻散主之。凡痘子收後，發癰毒者，要分經絡論氣血多少而治，不可妄用利藥，宜大補氣血。蓋此時氣血已虛，十全大補湯加忍冬草主之，外用敷貼拔毒膏主之。凡痘子用藥，須分氣血虛實，毒氣微甚而治，故灰白者，不起發者，癢塌者，吐利者，寒顫咬牙者，手足冷者，皆氣虛也，宜用補氣之劑。瘡乾者，不紅活者，膿水少者，皆血虛也，宜用補血之劑。稠密者，掀腫者，紅紫者，皆毒甚也，宜用解毒之劑。陷伏者，兼氣血解毒治之。凡用補氣，宜四君子湯。如瘡帶濕，或有自利，用之可也。若瘡乾者，白朮燥津液，茯苓滲津液，或「便秘實者，不可用也。」

凡用補血，宜「四物湯。」如瘡乾，或色太嬌，用之可也。若不能食者，生地黃泥膈，白芍藥收斂腸胃，必不可用也。

凡解毒不過黃連、黃芩、黃蘗、梔子、連翹、牛蒡子、升麻之屬，俱用酒制，恐其寒涼反損脾胃也。若欲行表，須少加桂枝。他如紫草、山豆根、葛根之類，則必不用酒製矣。

凡用解毒藥，要別臟腑，分陰陽而治之。如黃連解心火；黃芩解肺火，梔子解肝火；黃蘗解腎與三焦火；石膏解脾胃火；木通解小腸火；黃蘗又解大腸火；連翹、牛蒡子解瘡毒火；山豆根、紫草解痘毒火；升麻解疫毒火，各有主治不同也。又歲半已上屬陽，心肺主事，宜芩、連多用之；歲半已下屬陰，腎肝主事，宜黃蘗、梔子多用之。

凡治痘子要識證候，如痘腳稀疎，根窠紅潤，不瀉不渴，飲食不減，四肢溫和，身無大熱，如此候者，不須服藥，惟善調護，以待成就而已。若癢塌、寒顫、咬牙，渴不止，痘紫黑色，喘渴不寧；灰白色，頂陷腹脹，頭溫足冷，悶亂飲水，氣促泄瀉渴如此候者，不必服藥，雖強治之，亦無功也。

凡治痘瘡，善攻不如善守，表裡無邪，不須妄治。有等貪利之人，不分虛實，妄投湯丸，謂曾治某病，治某病，貪天功以為己有，以致虛虛實實，致生變異，悞人性命，此醫之罪也。

時俗出痘子者，謂是「天瘡」，不肯請醫看治，但謂「僧道呪水解厭」，習以成風。毒之輕者，能食者幸以痊愈。設或變證一出，不可救療，委之於命而不知省，此時人之罪也。

藥性主治及修製法藥性主治及修製法

痘疹之法，其要在分氣血虛實，及發表、和中解毒三治而已。《經》曰：「辛甘發散為陽，酸苦湧瀉為陰。」

又曰：「清陽發腠理，濁陰走五臟。清陽入四肢，濁陰歸六腑。」又曰：「形不足者溫之以氣，精不足者補之以味。味歸精，氣歸神。」可見藥有寒熱溫涼之性，酸苦辛鹹甘澹之味，浮沉升降補瀉之用，各有所宜，不可不知也。今將痘疹合用之藥。分氣血解毒三類。各具性味。主用修製於下。以便觀覽檢閱之暇。未必無小助也。

氣類氣類

人參，味甘，氣溫。氣味俱薄，浮而升，陽也。入手太陰肺經、足太陰脾經。補上焦元氣。「升麻為之使，補下焦元氣，瀉腎中之火邪。茯苓為之使。」主補五臟，生津液，止渴，治脾肺陽氣不足，胃中冷吐利。

擇堅實白淨者，去蘆用。肺熱咳甚者少用，以苦茶湯浸過無妨。

黃芪，味甘，氣溫平。氣薄味厚，可升可降，陰中陽也。入手少陽三焦經、手太陰肺經、足太陰脾經。性畏防風，得防風其功愈大，蓋相畏而相使也。補肺氣，實皮毛，善治脾胃虛弱，瘡瘍血脈不行，內托必用之藥也。止虛汗，去肌熱，又治消渴腹痛瀉利。

《擇柔》：韌皮微黃，肉中白者佳。瘡家宜生用。補虛宜炙用。痘子不發。宜酒炙透用。手足瘡不起。以桂枝煎酒浸過炙用。

白朮味甘，氣溫，味厚氣薄，可升可降，陰中陽也。入手太陽小腸經、手少陰心。主足陽明胃、足太陰脾、足

少陰腎、足厥陰肝經。主溫中，強脾胃，進食止下洩，利小便，和中益氣，止渴生津。

擇肉白而堅者，去蘆，刮去外黃皮用，去有油者，中腐者勿用。瘡乾者禁用，燥濕故也。止洩宜東陳壁土炒過用。痂皮不落，宜桂湯浸過用。

蒼朮，味苦甘辛，氣溫。味厚氣薄，可升可降，陰中陽也。入足陽明胃、足太陰脾經。主除惡氣，辟疫癘氣，健胃安脾，寬中，進食發汗。故「蒼朮發汗，白朮止汗。」

擇堅實中白淨者，刮去外粗皮令白，切片，以糯米濃泔浸透，搗出曬乾，取向東陳壁土炒黃色用。瘡

濕癢者。及不結痂。宜用之。痘家常宜燒之。以辟不正之氣。勿製。

陳皮，味辛苦，氣溫。味厚氣薄，浮而升，陽也。導滯氣，止嘔欬吐逆。去白理肺氣降痰，留白理脾胃消食。

擇紅黃色陳久者佳，用溫水洗淨，去白者，去白留白者，略去筋膜，切，曬乾用。止吐者，以東向陳壁土炒過用。

青皮味苦、辛，氣寒。氣味俱厚，沉而降，陰也。入手少陽三焦經、足厥陰肝經。散滯氣，瀉肝氣，消食破積。

擇小而皮薄陳久者佳。用溫水洗浸切開，去中穢與白令淨，剉碎曬乾，此痘家必用之藥，能瀉肝，令不成水泡而作癢。又起發遲者，癢塌者，並不可缺。

石菖蒲味辛、苦，氣溫。通九竅，出音聲。主癰腫疥癩，遍身熱毒痛癢，於山澗中取之，不聞人聲，及不露生者。

擇節密者佳，刮去外粗皮。瘡疹、驚癇、神昏、譫妄者必用之。瘡後不著痂，潰爛成瘡疥者，宜入丸用。

五味子味酸，氣溫，味厚，氣輕。陰中微陽，降也。入手太陰肺、足少陰腎經。主咳逆上氣，生津止渴。

擇肥大潤澤者佳。去梗。酒洗淨曬乾。痘家咳甚者宜用。

貝母，味辛苦，氣平、微寒。主咳嗽上氣，消痰。又敷惡瘡。能斂瘡口。

擇白而肥大，生者佳。去心，溫水洗過，切，曬乾用。

細辛，味大辛，氣溫，氣厚於味，陽也，少陰經藥。散水寒，治內寒，消死肌，又主喉痹。

擇細莖氣烈者佳。去蘆並葉，以溫水洗過，曬乾，宜少用。痘子初發表及痒塌者，用之良。

乾薑，味辛，氣大熱。氣味俱厚，半沉半浮，可升可降，陽中陽也。能溫脾理中，止吐瀉，去臟腑沉寒。生用發諸經之寒，其餘炮用。

擇新者，溫水洗浸火炙，令胖鬆用。惟內虛泄利不可缺，內實者戒用。

生薑，味辛，氣微溫。氣味俱輕，陽也。益脾胃，散風寒，治痰嗽，止嘔吐，能殺半夏之毒。

擇老者，水洗去泥，勿去皮用。凡痘瘡不能起發，灰白色者宜用之。如起發光壯紅綻者，不可用。若止嘔吐，須去皮紙包，慢火中煨過用。

麻黃味苦甘，氣溫。氣味俱薄，陽也，輕清而浮，升也。手太陰肺之藥，入足太陽膀胱，手少陰心陽明大腸經，榮衛藥也。發散風寒，泄衛實，去榮中寒，又消赤黑斑毒。《本草衍義》云：「痘瘡泡倒靨黑者，麻黃去節半兩，以蜜一匙同炒良久，以水半升，煎去上沫，再煎去三分之一，乘熱盡服之，避風，伺其瘡復出。」一法用無灰酒煎。但小兒不能飲酒者難服，然其效更速。

「擇陳久者佳，摘去根節，先用沸湯泡過三次，曬乾細切，又以蜜、酒各半浸良久，再曬乾，用瓦器炒令焦黑色。」凡痘疹出遲，及痘子黑陷者，倒靨者，並宜用之。

白芷，味辛，氣溫。氣味俱輕，陽也。通行手足陽明經。主一切瘡疥，排膿止痛，內托生肌。

擇白而堅實者，去蟲蛀，內青黑者不用。凡痘瘡發表及潰爛者，手足發癰毒者，並宜用之。

附子，味辛甘，氣大熱。其性走而不守，可升可降，陽也。補助陽氣不足，溫熱脾胃，治四肢厥逆。

擇頂平而圓，重一兩者佳。先以「童便浸過，紙包，慢火中炮令極熱，去皮臍切片，再用防風、甘草煎湯，乘熱浸過，曬乾用之。」惟痘瘡泄瀉內虛，手足冷，寒顫咬牙瘡灰白色或癢塌者可用之，其餘不可妄用。

半夏，味辛、苦，氣平，沉而降，陽中陰也。入足陽明胃、太陰脾、少陽膽經。化痰止嘔吐，益脾胃之氣。

擇白淨臍正而圓者佳，用沸湯泡洗令滑盡，切片曬乾。若止咳化痰，再用生薑自然汁浸過。凡渴者禁用，燥津液故也。

木香，味辛、苦，氣溫。味厚於氣，陰中之陽，沉而降也。主邪氣，避疫毒。能調氣和胃，散肺中滯氣，止瀉渴。《傷寒類要》云：「天行熱病，若發赤黑斑，木香二兩，水二升，煮取一升，頓服。」

擇形如枯骨枯牙者佳，不宜見火，諸湯中宜磨服之。此與青皮乃痘疹切要之藥，以其能行氣也，惟泄痢藥宜煎服。

肉荳蔻味苦、辛，氣溫。入手陽明大腸經。主調中下氣，止瀉利，開胃消食，皮外絡下氣，解酒毒，治霍

亂。

擇油色肥實者佳，用麪包裹，慢火中煨熟，乘熱以重紙包搥去油，入丸藥內用，乃內虛泄瀉之要藥，非此勿用。

砂仁味辛苦。氣溫。入手足太陰經陽明經。太陽經。主虛冷瀉痢。治脾胃氣血結滯不散。

擇無殼米堅實者佳，碎研入藥。凡痘瘡內虛瀉痢者宜用，傷食者不可缺。若婦人妊娠出疹痘者，又宜用。帶殼者，炒過研碎入藥，乃安胎之聖藥也。

桂，味辛甘，氣熱。氣味俱薄，體輕而上行，浮而升，陽也。

入手少陰經。桂枝入足太陽經。通榮衛，開腠理，和氣血，散風寒，痘瘡不起發，不光壯，非此不可，乃發表之要藥也。

擇薄而味厚者佳，刮去粗皮用。手足痘子發不透者，宜用此引經。若瘡癢塌，寒顫咬牙，宜加用之。若內虛腹脹，用厚而味辛者，刮取內肉，名「桂心。」惟妊婦出瘡者不可用，以桂能墮胎故也。

茯苓，味甘淡，氣平。氣味俱薄，能升能降，陽也。白者入手太陰、足太陽少陽，赤者入足太陰、手少陽、少陰經。抱根生者，名「茯神。」調胃氣，伐腎邪，降肺火，益氣力，止瀉，利小便，生津液。

凡補中氣不足用白，欲利小使用赤，蓋白者能補，赤者能利也。並削去皮用。如心熱神昏者，用茯神，去皮與中木用。

丁香味辛，氣溫，純陽。入手太陰肺、足陽明胃、少陰腎經。主溫脾胃，止嘔逆，去胃中寒。

凡痘瘡泄瀉，脾胃虛弱不足者，必用之。若癢塌寒顫，咬牙足冷者，此與桂並宜加用之。蓋丁香救裡，官桂發表也，非此證不可用。

藿香，味辛，氣微溫。氣厚味薄，浮而升，陽也。入手、足太陰經。助脾開胃，溫中快氣，治吐逆為最要之藥。

葉擇取真者，帶芳香之氣者佳。去枝莖，以水洗去土，曬乾用。入烏藥順氣散則理氣，入黃芪四君子湯則理脾。

檳榔，味辛苦，氣溫，氣薄味厚，沉而降，陰中陽也。消穀逐水，除痰癖，破滯氣，泄胸中至高之氣。

擇形若鷄心，正穩尖長，心不虛，中有錦紋者佳。痘疹家惟利藥內用之，研細末入藥，能墜諸藥，至於極下也。

枳殼味苦酸辛，氣微寒。氣厚味薄，浮而升，微降，陰中陽也。主胸膈痞塞，散結氣，逐水，消脹滿，安胃化痰涎，消食。又治遍身風疥。大風在皮膚中，如麻豆，苦癢。通利關節，主皮毛胸膈之病。

擇陳久堅厚不爛不蛀者佳，以溫水洗浸，刮去穰白，麩炒令熟用。此痘瘡必用之藥，故《四聖散》有枳殼，以能治遍身風疹苦癢，又能開胃消食，利五臟，通關節也。

枳實，味苦酸，氣寒。大抵與枳殼同。枳殼大，性詳而緩，治高，高者主氣，治在胸膈；實小性酷而速。治下，下者主血，治在心腹。故有高下、緩急之分。消食，散敗血，化心胸痰，主風癢麻痺，通利關節，逐停水，消脹滿。

擇陳久肉厚、不蛀、不爛者佳。以溫水洗浸去穰白。麩炒令熟用。

厚朴，味苦辛，氣溫氣厚。味厚，體重，濁而漸降，陰中陽也。溫中益氣，厚腸胃，走冷氣，消宿食，治腹痛脹滿，散結之神藥。

擇肉厚紫色者佳，削去粗皮，以生薑自然汁塗之，慢火上炙透，剉用。凡痘瘡腹脹，非此不除。

烏藥味辛。氣溫。主中惡。心腹痛。蠱毒疰忤鬼氣。宿食不消。天行疫瘴。治一切氣。

擇肉白者佳，刮去外粗皮，去蘆用。乃發表中藥。

巴豆，味辛氣溫。此斬關奪門之將，不可輕用。蕩滌五臟六腑，開通閉塞，利水穀道。

去殼，擇取肉白者，去皮膜與心，以「銀石器慢火炒令黃色，搗爛如膏，又以重紙包，搥去油白如霜，入丸藥中。」惟傷食腹脹作痛可用。

大腹皮味辛，氣微溫。下一切氣，健脾開胃。

鳩鳥多棲此樹上，細分開，先以酒掇洗去其濁，仍以大豆汁洗之，曬乾用。

吳茱萸味辛苦。氣溫大熱。氣味俱厚。陽中陰也。入足太陰少陰厥陰經。主溫中下氣。治脾胃傷寒冷。嘔逆胸滿。

擇粒小者，去枝梗，先以沸湯浸去苦汁，凡六七過，曬乾，於瓦器內慢火炒過。惟瘡痘飲冷傷胃，嘔逆不止者用之。

紫蘇味辛甘。氣溫。解肌發表。治心腹脹滿。開胃下食。用。葉惟發表湯藥用之。手掇令碎。

大棗，味甘氣平。溫氣厚陽也。安中養脾，助十二經。平胃氣，補少氣，少津液，身中不足。

擇肉厚味甘者佳，水洗過，劈去核，凡補藥不可缺。若用作丸，去皮核，搗爛如膏用之。

牽牛子味苦，氣寒，善走，主下氣，利大小便。以氣藥引之則入氣，以血藥引之則入血，大瀉元氣，用者戒之。不脹滿、不大便秘者勿用。

取黑者炒過，研取頭末，入丸藥內用。痘疹黑陷，大小便不通，煩躁者宜用之。非此證，不可妄用也。

烏梅，味酸，氣平，陽也。收肺氣，止下痢，澀腸止洩，去痰止渴。

擇肉多者，以溫水浸洗，去核令淨用。

杏仁味甘、苦，氣溫，入手太陰經。主咳逆上氣，下氣定喘，潤心肺，散肺經風咳嗽，消心下急滿痛，散結潤燥。

擇去雙仁者，以湯浸去皮尖，炒令黃色，研爛如泥用之。

粳米，味甘，氣平、微寒，入手太陰、少陰經。主益正氣，止煩渴，止洩，平和五臟，補益胃氣，其功莫及。

杵令精，鑿為糜粥，常用之良。其泔水煮溫飲，止渴尤佳。

陳倉米，味甘、鹹、酸，氣溫。除煩渴，開胃氣，止洩。

取多年倉庾中香黃者佳。凡痘瘡泄渴甚者，可用此炒熟煮湯飲之。

酒味苦甘辛，氣大熱。行藥勢能行諸經。

凡痘瘡解毒藥須酒浸洗炒用，可以通行一身之表。

赤石脂，味甘、酸，氣溫。陰中之陽。止洩利澀，可去脫，為收斂之劑。

擇赤色細膩者佳，研極細，入丸藥內用。痘瘡泄痢者，非此不可。

枯白礬，味酸澀，氣寒。止瀉利，與赤石脂同功。又治疔蝕瘡。

擇白淨光明者，以《瓦》甌盛之固封。火煨過用。入丸藥中。單以止洩。

《漿水》味甘、酸，氣涼。微溫。主調中引氣開胃，止渴解煩，去脾胃中熱。

以熟粟米入水洗。新鮮白花者佳。陳久者不可用。痘疹大渴。宜飲之。

龍骨味甘，氣平。微寒，陽也。去脫，固氣澀腸。

擇白者，研極細，入丸藥。痘疹惟滑洩者用之。

麝香味辛，氣溫。

取當門子。痘瘡惟黑陷者，用此引發表解毒之劑，直入骨髓，透臟腑，拔除毒氣，使之發散也。非黑陷與伏，切忌妄用。

穿山甲氣微寒。

取嘴爪上甲，以東向陳壁土拌炒令焦黃色，研極細。此與麝香同功。痘瘡陷伏者，借此引導諸藥，非陷伏者勿用，反耗氣血也。

血類血類

當歸，味辛、甘，氣溫。氣味俱輕，可升可降，陽也。入手少陰心、足太陰脾、厥陰肝經。頭止血，身和血，尾破血。全用無效，治血通用，能使氣血各有所歸，故名當歸。和血補血，大補不足。

擇肥軟者，去蘆，以酒洗淨曬乾。如痘子血熱者，用尾，血虛者用「頭身。」

川芎味辛氣溫，氣厚味薄，浮而升，陽也。少陽引經，入手足厥陰經。上行頭目，下行血海，通肝經血中之氣藥也。散肝經風，頭目風不可缺。溫中散寒，開鬱行氣燥濕。

擇形塊重實如雀腦，色白者佳。凡頭面瘡不起發，或作癢者，非此不可。白芷為之使。

芍藥，味苦酸，氣微寒。氣薄味厚，陰也，降也，陰中之陽也。入手足太陰經。抑肝暖中，扶陽收陰，補血散惡血。脾經之藥，白者補，赤者瀉，赤者利小便下氣，白者止痛散血。冬月減芍藥，以避中寒。

凡痘瘡初發表，或血熱，或小便不利，並用赤。如氣血虛，脾胃弱及和中，並用白。俱酒浸透，切片曬

乾，炒過用之。如瘡癢塌，或手足不起發者，此脾虛也，只用白者，以桂煎酒浸炒用。

地黃味甘苦，氣寒，氣薄味厚，沉而降，陰也。生者大寒，入手太陽經、少陰經。涼血生血，補腎水真陰不足，瀉脾中濕熱及血熱。熟者微溫，入手足少陰經、厥陰經，大補血衰。

擇肥嫩大者，水浸驗，沉者乃佳。陰乾生者，名「乾地黃」，凡痘瘡血熱者，瘡乾枯者，身大熱者宜用之。酒蒸黑爛者，名「熟地黃」，凡血虛者宜用之。並須酒洗浸曬乾用。

天門冬，味苦甘，氣寒，氣薄，味厚，陰也。入手太陰肺、足少陰腎經。瀉肺火，療熱侵肺，吐衄妄行。定肺氣咳逆，喘息促急。潤燥止消渴。

擇肥大者，湯浸去皮去心，曝乾用。肺火盛者，非此不除。

麥門冬，味甘、微苦，氣平、微寒，陽中微陰。入手太陰肺經。治心肺熱，瀉肺中伏火，及治血妄行。主口舌燥渴，病後虛熱，能潤經復脈，益血除煩。

擇肥大者，去枝梗，湯浸去心用，不則令人煩。痘疹燥渴，最宜多用。

紅花味辛甘苦，氣溫，陰中之陽。多用則破血，少用則入心。養血和血，與當歸同功。子吞數粒，主天行瘡子不出。水浸汁及胭脂，能點黑斑。

凡痘瘡色紅紫者，血熱也，用紅花以酒洗，曬乾入藥。瘡子黑陷，用子以酒浸曬乾，慢火微炒，研爛入藥。

牡丹皮味辛、苦，氣寒。陰中微陽。入手厥陰經、足少陰經。主邪氣驚癇。瀉陰中火。除衄血吐血。

擇肉厚者，去心用，痘瘡血熱者宜之。

牛膝，味苦、酸，氣平。主四肢拘攣，不可屈伸，活血生血，能引諸藥下行。腰腿之疾不可缺。

擇長大而柔潤者佳。去蘆酒洗，陰乾用。

蒲黃味甘。氣平。主利小便。止血消瘀血。治一切吐衄腸風。血痢尿血。

若破血消腫，即生用。補血止血，則炒用。

續斷味苦辛，氣微溫。主傷寒，補不足，調血脈，止痛生肌。

擇節節斷皮黃皺者佳。酒浸曬乾用。

茅根，味甘，氣寒。補中益氣，利小便，除瘀血，止消渴，解腸胃熱。

掘取新者。擇肥大白淨者。搗碎。絞取自然汁入藥。

大小薊根，味甘、苦，氣溫。主養精保血，止吐血衄血下血。婦人痘疹，經血妄行者，非此不可。

香附子，味甘，氣微寒，陽中之陰。能下氣開鬱，又逐去凝血，炒黑能止血，凡血氣藥必用之。能引血藥至氣分而生血，婦人之仙藥也。

石臼中杵淨。勿犯鐵。以童便浸曬乾，炒黑杵末用。

地骨皮味苦，氣寒陰也。入足少陰、手少陽。主五內邪氣，熱中消渴，及去肌熱，涼血涼骨。

「擇肉厚者，溫水洗淨，去骨，曬乾用。」此與牡丹皮同為解肌熱之藥，但牡丹皮解無汗骨蒸，地骨皮解有汗骨蒸。

蘇木，味甘酸，鹹氣平，陽中之陰。主破血排膿，止痛，消癰腫。剉碎，酒浸，煮取濃汁入藥。

桃仁味苦甘。氣平。陰中陽也。入手足厥陰經。主瘀血閉血結血燥。通潤大腸。

擇去雙仁者，以湯浸，去皮尖，研如泥用。此與杏仁同潤大腸，但杏仁治氣祕，桃仁治血祕。

解毒類解毒類

甘草，味甘，氣平。生寒熟溫，陽也。無毒。入足厥陰太陰少陰經。主五臟六腑寒熱邪氣，解毒溫中，止渴，解百藥毒。性緩，能解諸急。熱藥用之緩其熱，寒藥用之緩其寒。生用大瀉肺火，消瘡疽。熟用能補三焦元氣，健脾和中，養血補血。稍子，生用除胃中積熱，去莖中痛。節生用消腫導毒，刮去皮。凡痘疹常用，取小

者生用，惟《大補》取大者，炙熟用。若欲解疫癘毒氣，於冬至日將甘草刮去皮，以竹筒一頭留節盛之，一頭以物塞定，置廁缸中四十九日取出用，名「人中黃」，解痘疹惡毒最佳。

黃芩，味苦，氣平寒，味薄氣厚，陽中陰也。可升可降。入手太陰肺經。主諸熱，解在肌風熱，泄肺中火邪，及胃中濕熱。主天行熱疾，利小腸。枯飄者名宿芩，入肺經，酒炒。上行圓實者名子芩，入大腸。除熱刮去外粗皮，切細，以酒浸曬乾，再浸再曬，酒盡為度，瓦器慢火炒焦用。如孕婦出痘疹者，擇條實黃芩，以水浸試，沉者佳。生用勿以酒炒。清熱降火，為安胎聖藥也。

黃連，味苦，氣寒，味厚氣薄，陰中陽也。可升可降。入手少陰心經。解熱毒，瀉心火，止驚悸，止消渴，調胃厚腸，除胃中濕熱。主熱氣目痛，及諸瘡腫毒，必然用之。《梅師方》云：「傷寒病發豌豆瘡，未成膿」，以黃連四兩，水三升，煎一升，去渣分服。

擇肥大堅實者，刮去鬚毛，切細，以酒浸曬乾，再浸再曬，酒盡為度，瓦器慢火炒焦用。暑月出疹子，生用。

黃蘗，味苦、微辛，氣寒。氣味俱厚，沉而降，陰也。足少陰經藥，太陽引經藥。主五臟腸胃中結熱，瀉膀胱熱，清小便，降相火。

擇緊厚鮮黃者，削去粗皮，切細，酒製如上黃連法。

梔子，味苦，氣寒，氣薄味厚，輕清上行，氣浮而味降，陽中陰也。入手太陰經。主五內邪氣，胃中熱氣，善除心中客熱，虛煩不得眠。又大病後亡血亡津液，臟腑無潤養，內生虛熱，非此不除。又能屈曲下行，降火。

擇七稜及肉鮮紅者佳，去內熱，用仁以酒製，如上芩、連法。去肌表熱，和皮用，亦以酒製如上法。

連翹味苦，氣平、微寒。氣味俱薄，陽也，可升可降。手足少陽經、陽明經藥。入手少陰心經。瀉心火，降脾胃濕熱，除心經客熱，主諸癰毒惡瘡，有神功。去梗去穰，以酒浸過，曬乾，研細用。

山豆根，味苦、甘，氣寒。主解諸毒，消瘡腫，治咽喉腫痛，尤解痘毒。《經驗方》：「患麩痘瘡，水研山豆根少許服。」凡用研水入藥內服。

牛蒡子一名惡實，一名鼠黏子，一名大力子。味辛、苦，氣平。主療風毒腫，瘡疹喉痹，風熱痰壅，咽膈不利，頭面浮腫。《王氏博濟》：治瘡泡將出，以牛蒡子炒令熟，杵為末。每服一錢，入荊芥穗，水一盞，同煎至七分，放溫服。如瘡疹已出，更服亦妙。

「以酒淘去沙土，又掠去浮面者不用，取沉重者，曬乾，瓦器上炒令聲盡，研細用。」此痘疹必用之藥也。

羌獨活，味甘、苦、辛，氣平、微溫。氣味俱輕，浮而升，陽也。

紫色而節密者為羌活，手足太陽引經藥，又足厥陰 少陰經藥。黃色而作塊為獨活，足少陰行經之藥。俱 透關利節，乃撥亂反正之主。

擇去腐爛者，痘瘡發表必用之，二活皆不可缺。

升麻味甘苦，氣平、微寒。味薄氣厚，浮而升，陽也。陽明引經藥，亦走手陽明、太陰經。主解百毒，辟瘟疫邪氣 時氣，瘡家之聖藥。主脾胃，解肌肉間熱，及發散本經 風邪。若元氣不足，陽氣下陷者，用此升提陽氣上升。《聖惠方》：「治小兒癩瘡及豌豆瘡，心躁眠臥不安。用川升麻一味，不記多少，細剉，水一盞煎，去渣取汁，以綿」沾汁洗拭瘡上。《外臺祕要》：「比歲有病，天行時病，發斑 瘡，頭面及身，須臾周匝狀如火燒，瘡皆戴白漿，隨決 隨生。不治數日必死。差後癩黯，彌歲方滅，此惡毒之 氣所為，以水煮升麻，綿沾水洗之。」

擇形輕而黑堅實者，第一細小。皮青綠色者亦佳，謂之「鷄骨升麻」，去黑皮及腐爛者。如瘡出遲，起發遲者，以酒洗過用。

葛根，味甘，氣平，性輕。浮，陽也，足陽明胃行經藥。主消 渴，身大熱，解諸毒，解肌發表出汗。治脾虛而渴。能升 提胃氣，除胃熱，治天行時病，壯熱煩渴、熱毒。

擇白淨多粉者佳，削去皮。凡發表解肌熱，切細用。若止渴，搗碎，以糯米泔濾取粉用。

防風，味甘、辛，氣溫，純陽。脾胃二經行經藥，太陽經本經藥，乃卒伍卑賤之職，隨其所引而至者也。瀉肺實，散頭目中滯氣，除上焦風邪之仙藥也。

擇實而脂潤，頭節堅者佳。去蘆，並叉頭叉尾者不用，發表不可缺。如瘡癢密者，與黃芪同用。如手足瘡不起發者，與白芍、桂枝同用，須以酒洗之。瘡濕者用之，風勝濕也。瘡乾者亦用之，又藥中潤劑也。

荊芥穗味辛苦。氣溫。辟邪氣。通利血脈。傳送五臟。能發汗動渴。又主瘡瘍。破結聚氣。

取花實成穗者，去灰土用。凡痘子出發不快不透者，皆不可缺者也。

桔梗，味辛、苦，氣微溫。味厚氣輕，陽中之陰。治鼻塞咽喉痛及喉痹，利嗝咽胸膈之氣。治肺熱嗽逆，消痰涎肺癰。又能開提氣血，能載諸藥不下沉，故名「舟楫。」

擇白淨堅實者，截去頭及兩畔附枝，切片，以米泔浸一宿，陰乾用。

柴胡，味辛，氣平、微寒。氣味俱輕，陽也，升也，少陰經、厥陰經行經之藥，主寒熱邪氣，推陳致新，又能引清氣行陽道，升提胃氣，上行春令。

擇獨根柔輒者佳。去蘆叉尾者，發表退熱用之。

前胡，味苦，氣微寒。主心腹結氣，治時氣發熱，推陳致新，去實痰下氣最要。

擇肥實柔輦者。獨根者佳。去蘆叉尾者用。

石斛。味甘氣平。治胃中虛弱有功。平胃氣。長肌肉。逐皮膚邪熱痲痛。及腳膝軟弱。

擇取新者，去枝節，酒洗蒸過用。

車前子味甘鹹。氣寒。主利水道。小便淋漓。雖利小便而不走氣。療肝中風熱。衝目赤痛。

擇去沙土，研細入藥。凡痘疹小便不通最宜。

白蒺藜味苦辛，氣溫、微寒。治身體風癢，去惡血，長肌肉，明目輕身。

擇白者炒，先搗去刺，後研細入藥。痘瘡瘙癢潰爛者宜用。

元參，味苦、鹹，氣微寒。足少陰經君藥。此乃樞機之劑，管領諸氣，上下肅清，而不獨治空中細縈之氣，無根之火，此乃聖藥也。

擇肥大者，去蘆，稍勿犯鐵。

鬱金，味辛、苦，氣寒，純陽。主血積下氣，涼心止血，破惡血。此芳草也，因輕陽之性，古人以治鬱遏。

擇圓而長如蟬蛻，色赤如薑黃者，痘疹陷伏，須此發之。

龍膽草，味苦澀，氣大寒。氣味俱厚，沉而降，陰也。除胃中伏熱，時氣溫熱，止驚悸。治兩目赤腫，睛脹疼痛不可忍。

去蘆，酒洗淨，再浸，曬乾用。瘡疹目赤痛，非此不除。

防己味辛苦，氣平，寒陰也。通行十二經。主肺氣喘嗽，殺癰腫惡結，諸蝸疥癬蟲瘡，除邪，利大小便。膜主水氣，木主風氣。

擇文如車輻者堅，鮮者佳。如治咳，生研末入丸用。如治痘疹陷伏，須酒洗浸曬乾用。

瓜萇根味苦。氣寒，味厚。陰也。主消渴。身熱煩滿。大熱 脣乾口燥。排膿消腫毒。生長肌肉。

新取入地深大而有粉，白淨者佳。凡痘瘡潰爛，削去皮用。如大渴者，削去皮，置石鉢內搗爛，以糯米泔水攪開，濾取粉，名「天花粉」，陰乾用。

苦參，味苦，氣寒，沉，純陰。治時氣惡病大熱，及遍身熱，細疹癢塌，治大風有功。

削去皮，切細，酒浸蒸，再浸再蒸，酒盡為度，陰乾。凡

痘瘡癢癢，潰爛如癩，以此作丸效。如咽喉痛，生研細末用。

茵陳，味苦、辛，氣平、微寒。陰中微陽。入足太陽經。解傷寒煩熱，行滯氣，化痰利膈。

擇陳久者佳。凡夏月瘡疹熱甚。小便不利者宜用。如痘子癢癢。可為熏藥。以能去濕熱也。

知母，味苦、辛，氣寒。氣味俱厚，沉而降，陰也，足少陰經本藥。主消渴熱中，補腎水，瀉腎中火，消痰止嗽，潤心肺。患人虛而口乾者多用。

擇取肥實肉白者，去皮毛。勿犯鐵。惟疹子多用之。

馬兜鈴味苦，氣寒。主肺熱咳嗽，氣上逆，痰結喘促。只取裡面子，去殼膜，炒用。

大黃，味苦，氣大寒。氣味俱厚，沉而降，陰也。入手足陽明經。蕩滌腸胃，推陳致新，通利水穀。性走而不守，瀉諸實熱不通，心腹脹滿，下大便結燥，號稱將軍，取其蕩滌峻快也。《聖惠方》：「治時氣發豌豆瘡，用川大黃半兩，微烘，以水一大盞煎服。」

擇堅實錦文者佳，切，以酒浸蒸，九浸九蒸，曬乾用。痘瘡惟大便不通，腹脹煩躁者宜之，不可妄用。

葶藶，味辛、苦，氣大寒。治肺壅上氣咳嗽，喘促痰飲，通利水道，走瀉為功大降氣。病人虛者宜遠之。

擇味甜者，以酒淘淨曬乾，紙上微炒，研入丸用。惟疹子咳不止宜之。

「豬苓，味甘苦而淡，氣平。氣味俱薄，升而微降。」入足太陽、少陰經。解傷溫疫大熱，除濕利水道，治渴。

擇堅實肉白者佳。去黑皮，痘瘡惟小便澀者用之。

澤瀉，味甘鹹，氣寒。氣味俱厚，沉而降，陰也。入足太陽、少陰經。治淋閉，逐膀胱三焦停水，瀉腎邪，除濕行水，為最要之藥。

擇白淨者，刮去皮毛，治與豬苓同。

木通，味辛甘，氣平。氣味俱薄，陽也。除脾胃寒熱，通利九竅血脈關節。治五淋，利小便，導小腸熱，出音聲，療耳聾，治鼻塞，散壅腫諸結不消。

擇小者去皮用。凡痘疹小便不利者。最宜之。如痘後發癰毒者。用木通節酒洗浸曬乾。

瞿麥，味苦、辛，氣寒，陽中微陰。主關格諸癰結，小便不通，決癰腫排膿，明目去翳。

擇去枝梗，取實者用。凡痘疹小便不利，與木通同功。

紫草味苦，氣寒。治傷寒時疾，發瘡疹不出者，利九竅，通水道。《經驗後方》：「治嬰兒、童子患疹痘

疾。用紫草二兩，細剉，以百沸湯一大盞泡，便以物合定，勿令氣漏。放如人體溫，量兒大小，服半合至一合。」服此藥者，瘡雖出，亦當輕減。

擇肥嫩者，去蘆用之。如痘瘡大便滑利者勿用。

《大》。戟味苦甘，氣大寒，陰中微陽。主行十二水，伐腎邪。去蘆泔，水浸洗曬乾。惟痘瘡黑陷歸腎，大小便不通，腹脹煩躁者，宜此以瀉膀胱之邪，非此者不可妄用。《大青》味苦，氣大寒。主療時氣天行熱疾，解一切斑疹熱毒。凡出疹子用之，痘子不同。

射干味苦，氣平、微溫。主喉痺咽痛不得消息，散結氣，消腫毒，行太陰、厥陰之積痰，使結核自消，甚捷。勿久服，令人虛。

掘取新者。去根切片。以甘草水浸曬乾。瘡疹咽痛者用之。

《菊花》味苦甘，氣平寒。明目，養目血，去翳膜。

擇花黃味甘，應候開者佳。去枝葉用。主痘後目病。

《木賊》味甘微苦。主目疾。退翳膜。明目。益肝膽。

摘去節，以酒潤濕，火上烘用，治痘後目疾。

穀精草，味辛，氣溫。主明目，去膚翳。淡竹葉，味辛甘，氣寒。涼心經。除煩熱止渴。

擇節間有白粉者是，不可以山谷中生者為之。

桑白皮，味甘、辛，氣溫。入手太陰經。瀉肺氣有餘，喘嗽唾血，消痰止渴，去肺中水氣。

新掘取，入土深東行者佳，出土上者殺人。刮去青黃薄皮，勿令皮上涎落。細剉，以蜜水浸透，曬乾再浸，如此三次，炒黃色用。

「蔓荊子，味苦、辛、甘，氣微寒。溫。陽中之陰，《太陽經》藥。」主風頭痛，腦鳴，目淚出，散風邪，除目睛內痛。

擇淨，以酒浸曬乾，痘瘡頭面大腫者宜用。

密蒙花味甘，氣平、微寒。主青盲膚醫赤澀。多眵淚，消目中赤脈。小兒麩豆及疳氣攻眼。

擇淨花，以酒浸一宿，候乾，又以蜜合調，蒸之，曬乾，痘後目病用之。

訶梨勒，味苦、酸，氣溫，性急善降，開胃澀腸，止瀉痢。又治肺氣因火傷極，鬱遏脹滿，喘急咳嗽。味酸、苦，故有收斂降火之功。

擇六稜黑色肉厚者佳。去核，痘瘡內虛泄瀉，必用之藥也。

馬齒莧味酸，氣寒，性滑。《肘後方》：「療豌豆瘡。馬齒莧燒

灰傅瘡根上，根須與逐藥出，若不出更傅良

用葉小者節葉間有水。入藥去莖節。燒灰不去

胡荽味辛，氣溫。療沙疹豌豆瘡不出，作酒噴之立出。
《經驗方》「痘疹不出，用胡荽二、三兩切細，以酒二大盞煎令沸，沃胡荽，便以物合定，不令泄氣，候冷去渣，微微從項以下噴一身令遍，除面不噴。」

香薷，味辛，氣微溫。治傷暑，除煩熱，調中溫胃，利小便。肺得之，則清化行而熱自下。用莖、穗、葉，去根，以上半夏月出痘疹，不可缺清暑故也。

薄荷，味辛、苦，氣涼。氣味俱薄，浮而升，陽也。入手太陰經、厥陰經。主賊風傷寒發汗，通利關節，及小兒風涎，驚風壯熱，乃上行之藥，能引諸藥入營衛。

擇葉小如金錢者佳，去莖用葉，痘疹發表藥用之。

山楂子，一名「糖毬子。」味甘、酸，氣平溫。陰中之陽也。消食，行結氣，健胃。又催瘡瘍，消滯血。

擇色紅、肉厚、無蟲者佳。蒸去核用。

胡麻一名「巨勝子。」味甘。氣平。補五內。益力氣。長肌肉。堅筋骨。療疥癬及浸淫惡瘡。

擇如油麻紫黑色者佳。酒淘浸，曬乾妙。用痘後成爛瘡者最宜。

生大豆，味甘，氣平。解諸毒，除胃中熱，散五臟結積。《子母祕錄》治小兒斑疹痘瘡。熟煮大豆，取汁服

之。

擇黑而小者佳。其殼，去目中麩醫。

淡豆豉味苦，氣寒。治傷寒時疾，發汗，主寒熱瘴氣惡毒，煩躁滿悶，痘疹發表解表宜用之。

擇新者無鹽者佳

赤小豆，味辛甘酸，氣溫平，陰中之陽。主下水，排癰腫膿血，熱中消渴，止瀉，利小便，解諸毒熱。凡小兒未出瘡疹者，宜常食之。瘡疹中渴，以此煎湯飲之甚佳。菘豆，味甘，氣寒，皮寒肉平。治消渴丹毒，煩熱風疹，解諸毒。未出瘡疹者宜煮食。勿去皮，其皮能去目翳。丹砂，味甘，氣微寒。痘將出，蜜調服解毒令出，少大塊光明者佳，細研水飛用。此物鎮養心神，宜生用。硝，味苦辛鹹，氣寒，氣薄味厚，沉而降，陰也。主諸寒熱邪氣，逐六腑積聚，破留血停痰痞滿，大小便不通，推陳致新，治天行熱疾，消腫毒，排膿軟堅。《梅師方》：傷寒發豌豆瘡未成膿，研硃硝，用豬膽相和塗瘡上立效。非大小便秘結，煩悶欲死者，不可輕用。

滑石，味甘，氣寒，性沉重。入足陽明經。主燥濕，實六腑，化食毒，行積滯，逐凝血，解燥渴，補脾胃，降妄火之要藥。

擇白如凝脂，軟滑者佳。青黑色及粗者不可用。研細水飛過用。痘瘡潰爛，用此傅之良。痘毒發渴宜用。

石膏味辛甘，氣微寒。氣味俱薄，體重而沉，降，陰也。入手太陰少陽、足陽明經。主時氣肌肉壯熱，大渴引飲，清金制火，潤肺除三焦大熱，瀉胃火，解肌化斑毒。

擇細理白澤者佳，研極細用。惟疹毒最宜，痘家少用。

臘雪，味甘，氣寒。解一切毒。治天行時氣瘟疫。臘月取瓶罌收貯封固，埋土中候用。

蜜陀僧味鹹、辛甘，氣平。主金瘡口瘡。面上癩。𩚑

《譚氏小兒方》：「療痘瘡癩面靨，以蜜陀僧細研，水調，夜塗之，明旦洗去，平復矣。」

龍腦味辛苦，氣溫，屬陽。《經驗後方》：治時疾發豌豆瘡及赤瘡，心煩狂躁，氣喘妄語，或見鬼神。取一錢細研，旋滴豬心血和丸如雞豆肉大。每服一丸，紫草湯下，少時心神便定，得睡，瘡復發透，依舊將息取安。犀角味苦酸鹹。又云：甘辛氣寒，主百毒，療傷寒瘟疫，煩悶大熱。丹溪云：屬陽，性走散，痘瘡後用此散餘毒。若無餘毒而血虛者，不宜用。

蜜味甘，氣平、微溫。色白如膏者佳。《外臺祕要》：比歲有病天行疹發瘡頭面及身，須與周匝，狀如火瘡，皆戴白漿，隨決隨生，不即療之，數日即死。此惡毒之氣。世人云：建武中南陽擊魯，染惹流入中國，呼為魯瘡。諸醫參詳治之方：取好蜜便抹瘡上，以蜜煎升麻，數數拭之。

蟬蛻，治目昏翳，又風氣客熱，皮膚瘙癢不止。又水煎汁，治小兒出痘瘡不快，良。凡痘疹出不快，或倒陷黑陷者，擇完全者，以溫酒洗去土，勿去爪翅，研細入藥調服。若去目中翳，去爪翅，研細入湯調服。人屎氣寒，主療時行大熱狂走，解諸毒，治瘡疹黑陷，燒過服之甚佳。於臘月東行，取絕乾者，以火燒之，令煙盡，研細用。

《人牙齒》氣平。除勞治瘡。蠱毒氣。入藥燒用。

忍冬藤一名金銀花，一名左纏藤，一名老翁鬚，一名水楊梅，一名鷺鷥藤。味甘，氣溫。無毒。主熱毒。

《蒲公英》，味甘，氣平，無毒。入陽明經、太陰經。主化熱毒，消惡腫，結核者有奇功。

蟾酥「五月五日取者佳。



本作品在全世界都属于[公有领域](#)，因为作者逝世已经超过100年，并且于1929年1月1日之前出版。



本作品原文沒有標點。標點是人工智能程序[古詩文斷句 v2.1](#)創建，並且經由維基文庫用戶編輯改善的。本站用戶之編輯以[知識共享 署名-相同方式共享 4.0 协议 \(CC BY-SA 4.0\)](#) 發佈。



歡迎各位持續修正標點，請勿複製與本站[版權協議](#)不兼容的標點創作。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Kwj2772
- Jdx
- 維基小霸王
- Rocket000
- Santoposmoderno
- HereToHelp

- Victormoz
- Srittau
- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)